



Inatsisartut

Aningaasaqarnermut Akileraartarnermullu

Ataatsimiititaliaq

Finans- og Skatteudvalget

Ulloq/Dato:

31. august 2012

J.nr.:

01.31.06/12-00593

Aningaasaqarnermut Naalakkersuisoq

Aningaasaqarnermut Akileraartarnermullu Ataatsimiititaliap suliaq nr. 01.31.06/12-00593 pillugu tallimanngornermi ull. 31. august 2012-imi aalajangiineranik Naalakkersuisunut ilisimatitsineq.

Nunap iluani ilaasunik, allakkanik nassiussanillu angallassineq pillugu kiffartuunneqarnissamik isumaqatigiissutit sivitsorneqarnissaat.

Naalakkersuisut **inassutigaa**,

- Kontop pingaernerup 73.01.08 ataani Kalaallit Nunaanni ilaasunik, allakkanik nassiussanillu angallassineq pillugu kiffartuunneqarnissamik isumaqatigiissutit pioreersut ukiunik marlunnik sivitsorneqarnissaannut akuersinissamut Ineqarnermut, Attaveqarnermut Angallannermullu Naalakkersuisoqarfik Naalakkersuisunit piginnaatinneqassasoq. Sivitsuinissami distriktit uku pineqarput: Qaanaaq, Upernavik, Uummannaq, Qeqertarsuup Tunua aasaanerani ukiuuneranilu, Kalaallit Nunaata kujataa, Tasiilaq aamma Ittoqqortoormiit. Isumaqatigiissutini piumasaaqatit ullumikkutut iinnassapput, aammalu isumaqatigiissutinut akiusut ilanngussaq 1-imi takussutissiami takutinneqarput.
- Qeqqata aamma Sermersuup Kommuniinut tunngatillugu Arctic Umiaq Line A/S-imut ukiuni marlunni atuuttussanik isumaqatigiissusiornissamut Ineqarnermut, Attaveqarnermut Angallannermullu Naalakkersuisoqarfik Naalakkersuisunit piginnaatinneqassasoq. Isumaqatigiissutinut akiusut ilanngussaq 1-imi takussutissiami takutinneqarput.
- Kalaallit Nunaata Avannaani Tunumilu timmisartut suluusallit atorlugit timmisartuussinissamut tunngatillugu Air Greenland A/S-imut ukiuni marlunni atuuttussanik isumaqatigiissusiornissamut Ineqarnermut, Attaveqarnermut Angallannermullu Naalakkersuisoqarfik Naalakkersuisunit piginnaatinneqassasoq. Isumaqatigiissutinut akiusut ilanngussaq 1-imi takussutissiami takutinneqarput.

Aningaasaqarnermut Ataatsimiititaliap oqaaseqaatai

Naalakkersuisut isummernissaannut tunngavissiami ilaatigut ima paasissutissiisoqarpoq:

”Aningaasaqarnikkut sunniutissat toqqaannartut saniatigut, aalajangiiniarnerup ingerlanera siunissaq ungasissoq eqqarsaatigalugu, Namminersorlutik Oqartussanit annertuunik aningaasartuuteqarfiujumaartussatut naliliiffigineqarpoq. Neqerooruteqartitsinermit sinaakkusiussat iluanni aaqqiissutissamik nassaartoqarsinnaassagaluartoq, neqerooruteqartitsineq taamaatinneqarmat, niuernermit nukiussat atorneqarsinnaajunnaarput, aammalu Namminersorlutik Oqartussat isumaqatiginninniartutut nukittussusiat annertuumik innarlerneqarsimavoq. Tamatumani saniatigut neqerooruteqartitsinerup taamaatinneqarnerani EU-mi suleqateqarnermut isumaqatigiissuteqarnermut atatillugu Namminersorlutik Oqartussat pisussaaffii uniorneqartut naliliisoqarpoq, EU-p tungaaniit ammasumik, naapertuuttumik, unammillersinnaassuseqartumik ersarissumillu

unammilleqatigiittoqassasoq, aningaasat pissarsiaqarfigneqassasut aammalu pisiniartarnermi politikimik nakkutilliisoqassasoq erseqqissarneqarmat. Neqerooruteqartitsinerup taamaatinneqarnerani piumasaqaatit taakku malinneqarsimanersut oqallisigineqarsinnaavoq, neqerooruteqartitsinerup ingerlanneqarnera neqerooruteqartitsinermut najoqqutassani malitassiaasunik naammassinniffiusumik inerneqarmat. Tamatuma kingunerisaanik Namminersorlutik Oqartussat 2013-imi EU-mut suleqateqarnissamut isumaqatiginninnialerunik nalorninartumik inississinnaapput.”

Tassunga tunngatillugu ataatsimiititaliamit oqaatigineqassaaq Naalakkersuisut inassuteqaataat Aningaasaqarnermut Ataatsimiititaliamit sukkulluunniit itigartinneqarsinnaammata. Taamaattumillu ataatsimiititaliaq isummernissamini Naalakkersuisut iliuuserisimasaannit pituttorneqarsinnaanngisaannarpoq. Taamaattumillu kingunerluutit Naalakkersuisut isummernissaannut tunngavissiami taaneqartutut ittut aatsaat pinngitsoortinneqarsinnaapput kiffartuussinissamik isumaqatigiissutinut Naalakkersuisut naatsorsuutigisaat aammalu neqeroortitsinermi najoqqutassani allannguutigitilersaagaat pillugit ataatsimiititaliat susassaartut qanimut oqaloqatiginerisigut, taamaaliornikkut tamatuma Inatsisartunit taperserineqarnera Naalakkersuisunit siumut qulakkeerneqarsinnaaqqullugu.

Neqeroorutini atorunnaarsitsineq kinguneqarnerluppat, taakku tassaapput aalajangerneq sioqqullugu politikikkut oqallinnissamik pisariaqartitsinerup pisariaqarneratut annertutigisumik isiginiarneqarsimannginnera.

Taamaalillunilu Naalakkersuisut Aningaasaqarnermullu Ataatsimiititaliap aammalu Sanaartornermut Avatangiisinullu Ataatsimiititaliap suliassaqarfik pillugu tullianik kiffartuussinissamik isumaqatigiissuteqarnissaq sioqqullugu sukumiisumik oqaloqatigiinnissaat pisariaqartinneqartoq suliamik matumani ingerlatsisimanagerup naqissuserpaa. Aningaasaliissuteqarnissamik qinnuteqaatip uuma akuerineqarneratigut tullianik kiffartuussinissamik isumaqatigiissuteqarnissaq ukiut marluk qaangiuppata pisussanngussaaq. Ukiuni aggersuni angallannerup aqqissuussaanissaa aammalu angallannikkut unammilligassat pillugit, suliassaqarfimmi kiffartuussinissamik isumaqatigiissuteqarnissamut tullermut tunngavissiiinnaasumik politikikkut siamasissumik isumaqatigiissuteqartoqarnissaanut taassuma tungaanut piffissaq atorluaqqullugu Naalakkersuisut ataatsimiititaliamit kaammattorneqarput.

Aningaasaqarnermut Ataatsimiititaliap aalajangiinera

Inassuteqaatit Aningaasaqarnermut Ataatsimiititaliamit **akuerineqarput.**

Aningaasaqarnermut Ataatsimiititaliaq sinnerlugu

Andreas Uldum
Siulittaasoq